

Sunday, May 17, 2026

Time - 2:30pm - 2:35 pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



UNION MINISTER

Nizan Khan Food, Civil Supplies & Consumer Affairs (FCS&CA) Department in Mizoram tlawha lo zin mek Union Minister of State(MoS) for Consumer Affairs, Food & Public Distribution (CAF&PD) Pi Nimuben Jayantibhai Bambhaniya pualin Aijal Club-a R.B. McCabe Hall-ah inkawmhona hun hmangin zanriah an buatsaih.

He hunah hian Supply Minister Minister Pu B. Lalchhanzova; Secretary Pu Ravi Dadhich, PS to MoS Pi Jagriti Rohit Singla, Addl PS to MoS Pi Khushbu Suthar leh Food Corporation of India (FCI) General Manager (NEF Region) Pu Sandeep Deora te bakah FCI leh state official dangte an tel a ni. Pi Nimuben Jayantibhai Bambhaniya chuan Mizoram a lo kal thei chu lawmawm atih thu sawiin, Mizoram chuan GI tag nei tawh Mizo Sawhthing leh Mizo Hmarcha te bakah khawvel hriat khawpa hmingthang Cheraw lam ang hian thil danglam leh tualchhuak thil engemaw zat a neih thu a sawi a; Mizoram a tlawh chhan chu a mawina leh hlawhtlinnate thlir ringawt tur ni loin state-in harsatna a neihte zira, a tul anga chingfel tura a lo kal thu a sawi a ni.

Pi Nimuben chuan Prime Minister Narendra Modi hruaina hnuaiah mi vaibelchhe 81-in a thlawnin ration an dawng rengthi sawiin, hei hi Europe rama mihring awm zat aia tam a nih bakah khawvel puma ei leh bar khamkhawp inngaihtuhsakna (food security program) lian ber a ni, a ti. Hei hi PM-in 'Mi zawng zawng tan Chaw' (Food for All) a ngaih pawimawh vang a nih thu sawiin, Mizoramah pawh mi tinin eikhawp hnianghnar an neih reng theih na'n theihtawp an chhuah dawn tih a tiam a ni. Union Minister chuan Supply Department hmalakna leh hlawhtlinnate fakin, e-KYC, EPOS leh SMART PDS te hian mi tam tak a tanpui a ni, a ti a. Hmarchhak bialah fur ruahtui tlak nasat avanga inkalpawhna kawngpui a chhiat fo thin thu pawh sawiin hmarchhak state-te hnenah fur thlen hmain thla 3 daih ration pek lawk an nih theih na'n tanpui a inhuam thu a sawi a, chutih rualin, Mizoram harsatnate CAF&PD Minister Pu Pralhad Joshi hnen thlenpui a, inkawmna hun siamsak a inhuam thu a sawi bawka a ni.

Pu B. Lalchhanzova pawhin thu sawiin Mizoram tlawh a, state harsatna hrang hrangte a hmun ngeia a rawn zirchian avangin Pi Nimuben hnenah lawmthu a sawi a. Mizoram eikhawp (food supply) a awm reng theih na'na an tanpuina avangin Sorkar laipui leh FCI-te hnenah lawmthu a sawi bawk. Minister chuan Mizoram pawhin sorkar laipui nena thawhdunna tha tak neih zawm zelin, mi tin chanvo tur bothlau a awm loh na'n tan nasa leh zuala tan lak tur thu a sawi a. Mizorama food supply tihhmasawn zel nan leh 'Mi zawng zawng tan Chaw khawpkham (Food for All)' a thlen ngei theih nan Mizoram NFSA quota tihpun sak turin MoS chu a ngen bawk a ni.



DISASTER TRAINING

Central Young Lai Association leh 23rd Assam Rifles ÷angkawpin YLA Tuithumhna Sub. Headquarters huam chhung khuate tana Disaster Management Training an buatsaih chu Assam Rifles Company Operating Base, Zorinpui-ah Central YLA Vice President Pu T. Rohlupua hovin nimin khan khar a ni.

Training kharna hi Lt. Col. Sahibjit Singh-an kaihruaiin YLA nena thawhhona ÷ha nei a, hetiang training an pe thei chu lawmawm a tih thusawiin tun hi first batch an ni a, mamawh dan ang zelin training hi kalpui zel an tum bakah hun lo kal leh zel turah pawh an Operational Area chhunga tlawmngai pawlthe nena thawhho zel an tum ati a, tualchhung mite'n rikrum thila an mamawh a nih phawt chuan engtiklai pawhin chechhuak turin anin peih reng tih sawiin, a rang thei ang bera hrilhzal turin a ngen ani.

He training ah hian branch hrang hrang atangin YLA member 24 an tel. Training a tel te hian hetiang training hi an vawikhat neihna a nih thu leh rikrum thilah pawh an ÷angkaipui dawn thu leh hlawkpui an tih thu an sawi ani. 23rd Assam Rifles hian he training a tel YLA Branch te tan Tuithumhna Sub Headquarters hruaitute hnenah suahdur 25 leh Search Light 10 an pe ani.



MONSOON

India rama khawchin thlirtu ber Indian Meteorological Department (IMD) hotute chuan kumin hian chawlhkar khat zetin fur a lo thleng hma dawn niin an hrilh lawk.

IMD Aizawl Director Pu Sudheer Kumar Dwivedi chuan Fur (Monsoon) chu June ni 1-ah lo thleng tlangpui thin a ngaih a nih laiin kumin hian May ni 26-ah a lo thleng dawn ni a ngaih a nih thu a sawi a. Ni 7-in a lo thleng hma tura ngaih a ni a ti a, hei hi Kerala a fur lo luh hun tur atanga chhut a ni a ti. Chu tih rualin ram chhunga fur lo thlen hun hi ni 4-in a hma emaw a tlai emaw thei tih a sawi bawk. Nikumah pawh khan May ni 27 a fur intan tura ngaih kha May ni 24-ah a thleng a. Kum 2020 atanga nikum inkar chhunga India rama fur lo thlen tlai ber chu kum 2023 kha a ni a, hemi kum hian June ni 8-ah a lo thleng a. A thlen hma ber chu nikum kha a ni thung ani.



CSR

Chief Minister Pu Lalduhoma chu nimin khan Samthang atanga Aizawl a panna lamah Khawzawlah a chawl a, Khawzawlah hian Dr. Suvajit Samanta, Regional Head, United Bank of India (UBI), Jorhat chuan an bank Khawzawl Branch-in an hlep atanga an CSR Rs. 83,400 chu Khawzawl District Hospital-a Water Filter leina atan a lo hlan.

UBI hian an Branch kum khat hlep atanga za zela pakhat hi CSR atana pek theihna dan an nei a. Tangka kum kalta a Khawzawl Branch hlep hian District Hospital mamawh ang leina hi daih chiah lo mah se bank hnathawkte thahnemngaihna leh mipui mamawhna a san avangin hetiang zat hi an pe ta a ni.

